

ՅՈՎՆԱՆՈՒ

1

2

3

4

ԳԼՈՒԽ 1

Տերոջը խօսքը Ամաթիին որդիին Յովնանին եղաւ՝ ըսելով.

² «Ելի՛ր, Նինուէ մեծ քաղաքը գնա՛ ու քարոզէ՛, քանզի անոնց չարութիւնը իմ առջեւ ելաւ»:

³ Բայց Յովնան ելաւ, որ Տերոջը երեսէն Թարսիս փախչի: Յոպպէ իջաւ ու նաւ մը գտաւ, որ Թարսիս կ'երթար: Անոր վարձքը տուաւ ու անոր մէջ մտաւ, որպէս զի անոնց հետ Թարսիս երթայ՝ Տերոջը երեսէն հեռու:

⁴ Տէրը ծովուն մէջ մեծ հով մը հանեց ու ծովուն մէջ մեծ փոթորիկ մը եղաւ, այնպէս որ նաւը խորտակուելու վտանգին մէջ էր:

⁵ Նաւաստիները վախցան եւ ամէն մէկը իր աստուծոյն կ'աղաղակէր ու նաւուն մէջի կարասիները ծովը նետեցին, որպէս զի զանիկա թեթեւցնեն. բայց Յովնան նաւուն խորշը իջնելով պառկեր էր ու խորունկ կը քնանար:

⁶ Նաւապետը անոր մօտեցաւ ու անոր ըսաւ. «Քեզի ի՞նչ եղաւ, ո՞վ խորունկ քնացող. ելի՛ր քու Աստուծոյդ աղաղակէ, թերեւս Աստուած մեզ յիշէ ու չկորսուինք»:

⁷ Իրարու ըսին. «Եկէ՛ք, վիճա՛կ ձգենք, որպէս զի գիտնանք թէ այս չարիքը որո՞ւն պատճառով մեր վրայ եկաւ»: Երբ վիճակ ձգեցին, վիճակը Յովնանին ելաւ:

⁸ Անոնք ըսին անոր. «Հիմա պատմէ՛ մեզի՝ թէ այս չարիքը որո՞ւն պատճառով մեր վրայ եկաւ: Քու գործդ ի՞նչ է: Ուրկէ՞ կու գաս: Քու երկիրդ ո՞րն է ու դուն ո՞ր ժողովուրդէն ես»:

⁹ Անիկա ըսաւ անոնց. «Ես Եբրայեցի եմ եւ ծովն ու ցամաքը ստեղծող երկնքի Աստուածը՝ Եհովան կը պաշտեմ»:

¹⁰ Այն մարդիկը խիստ շատ վախցան ու անոր ըսին. «Այդ բանը ինչո՞ւ ըրիր»: Քանզի այն մարդիկը գիտցան թէ Տերոջը երեսէն կը փախչէր, վասն զի անոնց պատմեր էր:

¹¹ Ուստի անոր ըսին. «Քեզի ի՞նչ ընենք, որ ծովը դադարի»: Քանզի ծովը երթալով աւելի կը սաստկանար:

¹² Անիկա ըսաւ անոնց. «Զիս վերցուցէ՛ք ու ծովը նետեցէ՛ք ու ծովը պիտի դադարի, քանզի ես գիտեմ թէ այս մեծ փոթորիկը իմ պատճառովս եղաւ»:

¹³ Այն մարդիկը թի քաշելով կը ջանային նաւը ցամաքը դարձնել, բայց չէին կրնար, քանզի ծովը երթալով աւելի կը սաստկանար:

¹⁴ Ուստի Եհովային աղաղակեցին ու ըսին. «Ո՛հ, Եհովա՛, կ'աղաչենք, այս մարդուն հոգիին համար մեզ մի՛ կորսնցնէր ու մեր վրայ անմեղ արիւն մի՛ դներ, քանզի դո՛ւն, ո՞վ Եհովա, ուզածիդ պէս ըրիր»:

¹⁵ Եւ Յովնանը վերցուցին ու ծովը նետեցին եւ ծովը իր կատաղութենէն դադարեցաւ:

¹⁶ Այն մարդիկը Եհովայէն սաստիկ վախցան ու Եհովային զոհ մատուցանեցին եւ

ուխտեր ըրին:

17 Եւ Տէրը մեծ ծուկի մը հրամայեց, որ Յովնանը կլլէ: Յովնան երեք օր ու երեք գիշեր ծուկին փորը մնաց:

ԳԼՈՒԽ 2

3 Յովնան ծուկին փորէն իր Տէր Աստուծոյն աղօթք ըրաւ

2 Ու ըսաւ. «Իմ նեղութենէս Տէր, քեզի աղաղակեցի Եւ դուն ինծի պատասխան տուիր: Գերեզմանին փորէն կանչեցի Ու իմ ձայնս լսեցիր:

3 Վասն զի զիս ծովերուն մէջ, անդունդը նետեցիր Ու հեղեղները զիս պաշարեցին. Կոհակներն ու ալիքները իմ վրայէս անցան»:

4 Ու ես ըսի. «Քու աչքերուդ առջեւէն վնասուեցայ, Բայց տակաւին քու սուրբ տաճարիդ պիտի նայիմ»:

5 Զիս մինչեւ հոգիս ջուրերը պաշարեցին, Անդունդը ամէն կողմէն զիս շրջապատեց, Կնիւները գլուխս փաթուեցան:

6 Լեռներուն տակերը իջայ, Երկիրը իր նիգերովը իմ բոլորտիքս էր, Բայց դուն իմ կեանքս գութն հանեցիր, Ո՛վ իմ Տէր Աստուածս:

7 Երբ հոգիս իմ մէջս մարեցաւ, Տէ՛ր, քեզ յիշեցի Ու իմ աղօթքս քեզի՝ քու սուրբ տաճարդ՝ հասաւ:

8 Սուտ ունայնութիւններու նայողները Իրենց ողորմութիւնը թողուցին,

9 Բայց ես շնորհակալութեան ձայնով քեզի զոհ պիտի մատուցանեմ Ու ըրած ուխտս պիտի կատարեմ: Փրկութիւնը Տէրոջմէն է»:

10 Եւ Տէրը ծուկին հրաման ըրաւ, ան ալ Յովնանը ցամաքը փսխեց:

ԳԼՈՒԽ 3

Տէրոջը խօսքը երկրորդ անգամ Յովնանին եղաւ՝ ըսելով.

2 «Ելի՛ր, Նինուէ մեծ քաղաքը գնա՛ ու տո՛ւր անոր այն պատգամը, որ ես քեզի կը յայտնեմ»:

3 Եւ Յովնան Տէրոջը խօսքին համեմատ ելաւ Նինուէ գնաց: Նինուէ խիստ մեծ քաղաք մըն էր՝ երեք օրուան ճամբու տարածութեամբ:

4 Յովնան քաղաքը մտաւ ու մէկ օրուան ճամբայ պտըտելով՝ կը քարոզէր ու կ'ըսէր. «Դեռ քառասուն օր կայ եւ Նինուէն պիտի կործանի»:

5 Նինուէացիները Աստուծոյ հաւատալով՝ ծոմապահութիւն քարոզեցին ու մեծէն մինչեւ պզտիկը քործ հագան:

6 Այս խօսքը Նինուէի թագաւորին հասաւ: Անիկա իր աթոռէն ելաւ ու վրայէն պատմութեանը հանեց եւ քործ հագաւ ու մոխիրի վրայ նստաւ

7 Եւ Նինուէի մէջ մունետիկ կանչել տուաւ ու թագաւորին ու իր մեծամեծներուն հրամանովը պատուիրեց՝ ըսելով. «Մարդ ու անասուն, արջառ ու ոչխար թող բան չուտեն, չարածին ու ջուր չխմեն

8 Եւ մարդիկ ու անասուններ քործ թող հագնին ու բոլոր ուժով Աստուծոյ թող աղաղակեն: Ամէն մարդ իր չար ճամբայէն ու իր ձեռքերուն մէջ եղած անիրաւութենէն թող դառնայ.

9 Ո՛վ գիտէ, թերեւս Աստուած դառնայ ու գթայ եւ իր սաստիկ բարկութիւնը իջնէ ու

չկորսուինք»:

¹⁰ Աստուած անոնց գործերը տեսաւ, որ իրենց չար ճամբաներէն դարձան, ուստի Աստուած գթաց ու այն չարիքը, որ անոնց վրայ պիտի բերէր, չբերաւ:

ԳԼՈՒԽ 4

3 Յովնան խիստ վշտացաւ ու նեղուեցաւ

² Ու Տէրոջը աղօթք ըրաւ ու ըսաւ. «Ո՛հ, Տէ՛ր, երբ ես դեռ իմ երկիրս էի, այսպէս չըսի՞: Ասոր համար Թարսիս փախայ, քանզի գիտէի թէ դուն ողորմած, գթած, երկայնամիտ եւ բազումողորմ Աստուած ես ու չարիքի համար կը ցաւիս:

³ Եւ հիմա ո՛վ Տէր, կ'աղաչեմ, իմ հոգիս ինծմէ ա՛ռ, քանզի մեռնիլս ապրելէս աղէկ է»:

⁴ Տէրը ըսաւ. «Միթէ այդպէս նեղանալովդ աղէ՞կ կ'ընես` »:

⁵ Յովնան քաղաքէն դուրս ելաւ ու քաղաքին արեւելեան կողմը նստաւ եւ հոն իրեն տաղաւար մը շինեց ու անոր հովանիին տակ նստաւ, մինչեւ որ տեսնէ թէ քաղաքին ի՞նչ պիտի պատահի:

⁶ Տէր Աստուած դոմենիի մը հրամայեց, որ Յովնանին վրայ ելլէ եւ անոր գլխուն վրայ հովանի ըլլայ, որպէս զի անիկա իր տառապանքէն ազատէ: Եւ Յովնան դոմենիին համար չափազանց ուրախացաւ:

⁷ Հետեւեալ օրը, առտուն, Աստուած հրամայեց որդի մը, որ դոմենիին զարնէ ու անիկա չորցաւ:

⁸ Երբ արելը կը ծագէր, Աստուած խորշակաբեր արեւելեան հովի մը հրամայեց ու արելը Յովնանի գլխուն զարկաւ, այնպէս որ անիկա մարեցաւ ու իրեն մահը ուզելով` ըսաւ. «Մեռնիլս ապրելէս աղէկ է»:

⁹ Եւ Աստուած Յովնանին ըսաւ. «Միթէ դոմենիին համար նեղանալովդ աղէ՞կ կ'ընես»: Անիկա ըսաւ. «Մեռնելու չափ նեղանալովս աղէկ կ'ընեմ»:

¹⁰ Այն ատեն Տէրը ըսաւ. «Դուն դոմենիին խղճացիր, որուն համար աշխատութիւն չքաշեցիր ու զանիկա չմեծցուցիր, որ մէկ գիշերուան մէջ բուսաւ ու մէկ գիշերուան մէջ կորսուեցաւ:

¹¹ Ես պիտի չխղճա՞մ Նինուէին, այն մեծ քաղաքին, որուն մէջ հարիւր քսան հազարէն աւելի մարդիկ կան, որոնք աջ ու ձախ ձեռքին տարբերութիւնը չեն գիտեր ու նաեւ շատ անասուններ»:

For other languages please go to www.wordproject.org